

Na osnovu člana 42. Zakona o državljanstvu Federacije Bosne i Hercegovine ("Službene novine Federacije BiH", broj 43/01), federalni ministar unutrašnjih poslova donosi

PRAVILNIK

O VOĐENJU KNJIGE DRŽAVLJANA FEDERACIJE BOSNE I HERCEGOVINE ZA LICA KOJA SU ROĐENA NA TERITORIJI REPUBLIKE SRPSKE

(Objavljeno u "Sl. novine FBiH", br. 46 od 12 septembra 2003)

I - OPĆE ODREDBE

Član 1.

Ovim pravilnikom propisuje se sadržaj i način vođenja Knjige državljana Federacije Bosne i Hercegovine (u daljem tekstu: državljanstvo Federacije) za lica koja su rođena na teritoriji Republike Srpske, a imaju stalno mjesto boravišta (u daljem tekstu: prebivalište) na teritoriji Federacije Bosne i Hercegovine (u daljem tekstu: Federacija).

II - POSTUPAK UPISA U KNJIGU DRŽAVLJANA FEDERACIJE

Član 2.

Lica koja su rođena na teritoriji Republike Srpske i koja su u toj Republici upisana u Matičnoj knjizi rođenih ili u Knjigu državljana, kao i lica koja su do 1979. godine rođena na teritoriji Federacije, a upisana u Knjigu državljana po ocu u Republici Srpskoj, a koja se stalno nastane u Federaciji u skladu sa članom 27., kao i lica iz člana 40. stav 1. Zakona o državljanstvu Federacije Bosne i Hercegovine, stiču državljanstvo Federacije upisom u Knjigu državljana Federacije prema ovom pravilniku. Lica iz stava 1. ovog člana imaju pravo podnijeti zahtjev kantonalnom ministarstvu unutrašnjih poslova (u daljem tekstu: kantonalno ministarstvo) na čijem području ta lica imaju prijavljeno prebivalište radi upisa u Knjigu državljana Federacije.

Član 3.

Zahtjev za upis u Knjigu državljana Federacije podnosi se na obrascu koji je dat u prilogu ovog pravilnika (Obrazac broj 1).

Uz zahtjev se prilažu slijedeći dokazi:

- 1) izvod iz Matične knjige rođenih;
- 2) ovjerenu fotokopiju lične karte;
- 3) uvjerenje o prebivalištu izdato od nadležne policijske uprave u Federaciji. Ovo uvjerenje treba da sadrži i podatak o mjestu prebivališta i na dan 6. 4. 1992. godine i
- 4) dokaz da nije državljanin Republike Srpske.

Član 4.

Kantonavno ministarstvo dužno je donijeti rješenje po podnesenom zahtjevu. Za podnosioca zahtjeva za kojeg se utvrdi da ispunjava sve uvjete za sticanje državljanstva Federacije iz stava 1. člana 2. ovog pravilnika, donosi se rješenje kojim se utvrđuje da stiče državljanstvo Federacije, a ako se utvrdi da nisu ispunjeni uvjeti, donosi se rješenje kojim se zahtjev odbija. U ovom slučaju u obrazloženju rješenja mora se navesti konkretan razlog zbog kojeg podnosilac zahtjeva ne ispunjava uvjete za sticanje državljanstva Federacije. Rješenje kojim se utvrđuje da je lice staklo državljanstvo Federacije donosi se na obrascu koji je dat u prilogu ovog pravilnika (obrazac br. 2. i 3.). Protiv rješenja iz stava 2. ovog člana može se izjaviti žalba Federalnom ministarstvu unutrašnjih poslova-Federalnom ministarstvu unutarnjih poslova u roku od 15 dana od dana prijema rješenja. Rješenje iz stava 3. ovog člana doneseno po žalbi je konačno i protiv njega se može pokrenuti upravni spor kod Vrhovnog suda Federacije Bosne i Hercegovine.

Član 5.

Primjerak rješenja kojim je podnosiocu zahtjeva priznato pravo za sticanje državljanstva Federacije kantonavno ministarstvo po službenoj dužnosti dostavlja nadležnom organu koji vodi matične knjige u općini u kojoj podnosilac zahtjeva ima prebivalište radi upisa u Knjigu državljana Federacije, a jedan primjerak tog rješenja dostavlja ministarstvu iz stava 3. člana 4. ovog pravilnika na uvid.

III - EVIDENCIJE O DRŽAVLJANIMA FEDERACIJE

Član 6.

Matični ured, kada primi rješenje iz člana 5. ovog pravilnika, dužan je izvršiti upis predviđenih podataka u Knjigu državljana Federacije koja je predviđena ovim pravilnikom. Knjiga državljana Federacije za lica iz stava 1. ovog člana vodi se na Obrascu broj 4 koji se nalazi u prilogu ovog pravilnika. Uz Knjigu državljana Federacije vodi se i Imenični registar. Knjiga državljana i Imenični registar vode se u obliku knjige koja je tvrdo ukoričena. Na vanjskoj strani prve korice mora biti naljepnica sa ispisanim nazivom knjige, odnosno registra i oznakom vremenskog perioda za koji se ta knjiga, odnosno registar vodi. Ako se vodi za više godina, na naljepnici će se napisati sve te godine.

Član 7.

Matični ured dužan je po službenoj dužnosti pismeno obavijestiti nadležni organ u Republici Srpskoj da je upisano lice steklo državljanstvo Federacije i da je upisano u Knjigu državljana Federacije.

IV - PRELAZNE I ZAVRŠNE ODREDBE

Član 8.

Matični uredi dužni su u roku od 30 dana od dana stupanja na snagu ovog pravilnika osigurati knjige državljana i imenični registar iz člana 6. ovog pravilnika.

Član 9.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 05/1-02-1-117

1. septembra 2003. godine Sarajevo
Ministar Mevludin Halilović, s. r.